

Storia di Santa Filomena

ORANJESTAD (AAN): Pa motibo cu na aña 304 mas of menos e Emperador di Roma kier a podera di Grecia, e Prins di Grecia, tata di Filomena a dicidi di bishita e Emperador pa purba evita un guerra. E Emperador a ricibi nan hopi bon. Despues cu nan a papia un rato contento, e Emperador a bisa cu nunca el a pensa di bay bringa contra Grecia. Mas contento ainda e famia a keda awor. Pero e Emperador kier casa cu Filomena.

E mayornan di Filomena mes no tabata kier pasobra e emperador ta casa caba. Ademas Filomena mes no tabata kier como cu el a entrega su mes completamente na Hesus. E emperador no a gusta e asunto aki mucho y el a manda cera Filomena den prison. Tur dia Filomena tabata resa pa Dios jud'e y compa'i'e. Cinco siman tras di otro e emperador tabata bin tur dia cerca dj'e pa purba pon'e cambia di idea, pero Filomena no kier a cambia di idea. Filomena cuminsa haya mas miedo pasobre e emperador tur dia tabata rabia un tiki mas. Un dia, despues cu e tabata cera pa 37 dia caba, Filomena a weita con e cuarto den cual e tabata cera a cuminsa briya cu un claridad masha bunita. el a weita Mama Maria cu Niño Hesus den su brasa.

Mama Maria a bis'e: "No tene miedo, tres dia so mas bo tin cu sufri y despues lo bo no sufri nunca mas". Filomena a bira masha contento mes. E emperador a sigui purba convence Filomena pa casa cu n'e, pero Filomena a keda bisa cu no. E ora si e emperador a rabia di berdad y a laga suta Filomena cu carbachi. Nan a suta Filomena masha mahos mes. el a keda tur na sanger y herida. Pero e siguiente dia ora e Emperador a bay cerca Filomena, e no a weita ningun herida ni un rascá na su curpa.

Tabata mescos cu Filomena no a haya sota. Y pasobra Filomena a keda bisa no, e Emperador a laga mara un anker hopi pisa na su garganta y a tir'e den riu Tiber. Pero Filomena a sali trankil for di awa manera nada a pasa. Nan a purba mat'e cu flecha, pero nan no a logra tampoco. Na final nan a logra mata Filomena toch. E Cristiannan a tuma e curpa di Filomena y a der'e. Nan a cera e graft y a skirbi cu inkt cora: "Pas sea cu bo, Filomena". Tambe nan a pinta un palma y lelie pa demostra e puresa di Filomena, un anker y flecha cu cual e soldatnan a purba mata Filomena.

E graf di Sta. Filomena a worde descubri dia 25 mei 1802 durante excavashon di

e restonan den e catacumbanan di Santa Priscilia na Roma. Riba e tegelnan cu tabata cubri su graf tabatin skirbi PAX TE CUM FILUMENA cu ta nifica PAS SEA CU BO FILOMENA. Presente na e momento di excavashon di e restonan tabata Msg. Ponzetti kende tabata encarga cu custodia di e relikianan sagrado. Ora nan a habri e caha, nan a haya wesonan di un mucha muher hoben. Tambe nan a haya un vaas cu sanger seco aden. E ora nan a compronde cu e mucha aki mester ta un martir Cristian.

Un pader yama Francisco de Lucia, kende tabata pastoor di Iglesia na Mugnano del Cardinale a bisa su Obispo: "No laga nos perde fe den Filomena. Mi ta sigur cu e tin un mensahe pa nos, especialmente pa nos hobennan pasobra e mes a muri jong". Na juli 1805 Don Francisco a bay Roma hunto cu e recien eligi obispo Pontenza e muy Reverendo Bartolomeno de Cesare. E tabatin speranza cu por a haya e reliquianan di un Santo pa su parokia. el a logra esaki mediante e intermediashon di Msg. Cesare.

Nan a pone e restonan di Santa Filomena den un urn y transporte pa Mugnano del Cardinale. Riba e anochi di 10 di Augustus e reliquianan di Santa Filomena a worde carga triunfantemente door di e pueblo di Mugnano y poni den un altar den e Misa di Nuestra Señora de Gracia, y na unda e ta actualmente. E pader a pidi un señora cu yama Angela yud'e cu un bistir pa Santa Filomena. Señora Angela tabata hopi malo, pero el a keda contento ora Pader Francisco a pidi'e pa yud'e. Ora Señora Angela a cuminsa traha ariba e bistir di Santa Filomena el a ripara cu su dolornan a cuminsa bay, el a sinti manera Santa Filomena a cuminsa cur'e.

Y berdad el a cura. Ora e dokternan a samin'e nan a bisa cu Señora Angela no ta malo mas. el a bira bon. Santa Filomena a haci su prome milager! Eynan hopi hende a cura. Hendenan cu tabata ciego por a mira atrobe. Hendenan cu tabata sordo por a tende atrobe.

Hendenan cu no por a cana por cana atrobe. Tur esey tabata sosoe ora nan tabata resa na Santa Filomena. Hopi hende tabata bay Mugnano pa resa na e altar di Santa Filomena, cu ta contene su restonan. Asina tambe tabata tin un señora cu yama Paulina Jaricot, cu tabata hopi malo. Pero ningun dokter por a cur'e. Señor Paulina a haci hopi bon pa su misa. el a resa hopi na Santa Filomena.

E tambe kier a bay Mugnano unda e restonan di Santa Filomena ta, maske ningun hende tabata kier pa e bay, el a bay toch. Na caminda pa Mugnano el a

pasa cerca Papa di Roma. E Papa cu a kere cu señora Paulina ta bay muri a bis'e: "Corda ariba mi ora bo ta den cielo". Señora Paulina a contesta: "Sigur cu si, pero kico ta para di Filomena? Si e cura mi, Santo Papa ta sigui traha pa declar'e Santo?" Papa a bisa: "Claro, pasobra esey lo ta un milager hopi grandi". Y tur a bisa cu el a cura. Dia 30 di januari 1837 Papa Gregorio a declara Filomena Santo. Y fiesta di Santa Filomena ta dia 11 di augustus. Nos mester ta agredecido cu Santa Filomena ta patrona di nos parokia. Santa Filomena pidi pa nos.